



**REPUBLIKA E KOSOVËS - ZYRA E PRESIDENTES**  
**REPUBLIC OF KOSOVO - OFFICE OF THE PRESIDENT**  
**REPUBLIKA KOSOVO - KANCELARIJA PREDSEDNICE**

**KËSHILLI KONSULTATIV PËR KOMUNITETE**  
**CONSULTATIVE COUNCIL FOR COMMUNITIES**  
**KONSULTATIVNO VEĆE ZA ZAJEDNICE**



**RAPORT VJETOR 2022**

Prishtinë, 2023

## PËRMBAJTJA

Fjala hyrëse e Kryesuesit të Këshillit.....	1
Fjala hyrëse e Sekretares së Këshillit .....	2
I. Përmbledhja ekzekutive .....	3
II. Themelimi i Këshillit Konsultativ për Komunitete.....	3
III. Udhëheqja, përbërja dhe struktura organizative e Këshillit Konsultativ për Komunitete.....	4
IV. Statusi dhe Mandati i Këshillit Konsultativ për Komunitete: .....	6
V. Sekretariati i Këshillit Konsultativ për Komunitete .....	9
VI. Objektivat e Punës për vitin 2022 .....	10
VII. Aktivitetet e Këshillit për periudhën raportuese .....	10
VIII. Organizimi i Seanacve të Nominimit me Organizatat Përfaqësuese të Komuniteteve .....	37
IX. Buxheti i Këshillit Konsultativ për Komunitete dhe raporti financiar.....	41
X. Përfundime .....	42

## Fjala hyrëse e Kryesuesit të Këshillit

Nga themelimi i vitit 2008 Këshilli Konsultativ për Komunitete në Republikën e Kosovës, ka funksionuar në mënyrë të suksesshme. Kam kënaqësinë e veçantë të paraqes raportin vjetor të punës së Këshillit, i cili paraqet mekanizmin kryesor për konsultim, bashkërendim dhe shkëmbim të rregullt ndërmjet komuniteteve dhe institucioneve shtetërore.

Raporti pasqyron veprimet dhe aktivitetet kryesore të zhvilluara nga Këshilli, në drejtim të përmbushjes së kompetencave dhe përgjegjësisve ligjore të Këshillit, si dhe objektivave të punës nga Plani Vjetor i Punës për vitin 2022.

Sikundër edhe viteve të mëparshme, edhe gjatë këtij viti, Këshilli Konsultativ për Komunitete me përkushtim të madh ishte i angazhuar në përmbushjen e funksioneve dhe mandatit kushtetues e ligjor të tij.

Këshilli ka qenë i fokusuar në organizimin dhe në artikulimin e pikëpamjeve të komuniteteve dhe pjesëtarëve të tyre përmes takimeve me përfaqësuesit e institucioneve të shtetit, shqyrtimit dhe dhënies së rekomandimeve në lidhje me legjislacionin, politikat dhe programet publike që kanë rëndësi të veçantë për komunitetet jo shumicë.

Përmbushja e objektivave të identifikuara është fryt i punës ekipore të anëtarëve të Këshillit dhe personelit të Sekretariatit, prandaj përfitoj nga rasti t'ju shpreh mirënjohjen gjithë anëtarëve të Këshillit dhe personelit të Sekretariatit për kontributin e dhënë dhe rezultatet e arritura në mbrojtjen dhe promovimin e të drejtave të komuniteteve jo shumicë.

Veçmas, në emrin tim dhe të anëtarëve të Këshillit, falënderoj Presidenten e Republikës së Kosovës, znj. Vjosa Osmani Sadriu dhe kabinetin e saj për inkurajimin, përkrahjen dhe mbështetjen e pa rezervë që na kanë ofruar në implementimin e mandatit të Këshillit, duke e shndërruar dhe mbajtur në këtë mënyrë Këshillin ndër mekanizmat institucionalë më të rëndësishëm në mbrojtjen dhe në promovimin e të drejtave të komuniteteve në Republikën e Kosovës.

**Agim Ferati**

## Fjala hyrëse e Sekretares së Këshillit

Të nderuar anëtarë të Këshillit,

Në zbatim të mandatit, përgjegjësive dhe detyrave ligjore, Këshilli ka miratuar Planin Vjetor të Punës për vitin 2022, në të cilin janë përcaktuar objektivat e punës dhe aktivitetet për realizim. Në zbatim të këtij plani dhe mandatit kushtetues dhe ligjor, Këshilli, grupet punuese dhe Sekretariati, kanë punuar me përkushtim të madh.

Në kuadër të raportit të përgjithshëm të punës së Këshillit, raporti i punës së Sekretariatit pasqyron në mënyrë përmbledhëse aktivitetet kryesore të zhvilluara nga Sekretariati, në drejtim të përmbushjes së objektivave të punës nga Plani Vjetor i Punës për vitin 2022.

Edhe gjatë këtij viti, personeli i Sekretariatit ishte i përkushtuar në arritjen e objektivave të përcaktuara të punës për vitin 2022. Në mënyrë të veçantë, Sekretariati ishte i fokusuar në sigurimin me kohë të shërbimeve profesionale dhe administrative për Këshillin dhe grupet punuese të tij. Gjatë vitit 2022, gjithashtu është organizuar edhe një proces i suksesshëm zgjedhor për anëtarët e rinj të Këshillit.

Duke zhvilluar në afate kohore aktivitetet e planifikuara dhe duke realizuar synimet e parapara, Sekretariati ka arritur plotësisht objektivat e punës të përcaktuara me Planin Vjetor të Punës për vitin 2022.

Zhvillimi i aktiviteteve në realizimin dhe arritjen e objektivave specifike të punës është rezultat i punës ekipore të personelit të Sekretariatit, prandaj dëshiroj t'i shpreh mirënjohje gjithë personelit të Sekretariatit për angazhimet e tyre dhe sukseset e arritura në zbatimin e planeve të punës, si dhe në sigurimin e funksionimit me efektivitet të Këshillit.

Veçmas, në emrin tim dhe të personelit të Sekretariatit, falënderoj Presidenten e Republikës së Kosovës, Dr. Vjosa Osmani Sadriu dhe kabinetin e saj, për mbështetjen dhe bashkëpunimin e vazhdueshëm me ne.

Sekretariati, po ashtu, edhe në vitin 2023, mbetet i përkushtuar në zbatimin e përgjegjësive të caktuara ligjore dhe planit vjetor të punës, për të siguruar funksionim efikas dhe administrimin e mirëfilltë të Këshillit.

**Nafiye Gaş**

## I. Përmbledhja ekzekutive

Për realizimin dhe përmbushjen e të drejtave të pjesëtarëve të komuniteteve jo shumicë në Republikën e Kosovës, është i një rëndësie të veçantë ekzistimi i institucioneve dhe mekanizmave të veçantë. Në këtë kuadër, në nenin 60 të Kushtetutës së Republikës së Kosovës është parashikuar formimi i Këshillit Konsultativ për Komunitete, në të cilin përfaqësohen nëntë (9) komunitete, me qëllim të realizimit të lirive dhe të të drejtave të pjesëtarëve të tyre. Këshilli vepron nën autoritetin e Presidentit të Republikës së Kosovës, ndërsa në përputhje me mandatin kushtetues dhe funksionet e përcaktuara me Ligjin për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës, Këshilli përfshin ofrimin e një mekanizmi për shkëmbimin të rregullt ndërmjet komuniteteve dhe Qeverisë së Kosovës, si dhe mundësinë e komuniteteve për të komentuar në një fazë të hershme nismat legislative dhe politike, të cilat mund të përgatiten nga Qeveria, për të sugjeruar nisma të tilla dhe për të kërkuar që pikëpamjet e tyre të përfshihen në projektet dhe programet përkatëse.

Në zbatim të mandatit, përgjegjësive dhe detyrave ligjore, Këshilli ka miratuar Planin Vjetor të Punës për vitin 2022, në të cilin janë përcaktuar objektivat e punës dhe aktivitetet për realizim.

Në zbatim të këtij plani dhe mandatit kushtetues dhe ligjor, Këshilli, grupet punuese dhe Sekretariati, kanë punuar me përkushtim.

Sekretariati i Këshillit ka punuar me përkushtim në sigurimin e mbështetjes profesionale dhe administrative të Këshillit, në sferën e dhënies së këshillave ligjore, përpilimin e rekomandimeve, organizimin e takimeve dhe në menaxhimin e buxhetit të KKK-së.

Në vitin raportues është siguruar pjesëmarrja e përfaqësuesve të organeve dhe institucioneve të tjera në punën dhe aktivitetet e Këshillit, si dhe është thelluar më tej bashkëpunimi me institucionet shtetërore, organizatat ndërkombëtare, OJQ-të dhe mediat.

Këshilli ka kodin e vet buxhetor. Për vitin fiskal 2022, në kategorinë paga dhe mëditje, janë ndarë 38,830.69 euro, ndërsa në kategorinë mallra dhe shërbime janë ndarë 82,390.00 euro. Kërkesat për ekzekutimin e pagave, mëditjeve dhe sigurimin e shërbimeve parashtrihen nga ana e Sekretarit të Këshillit, ndërsa ekzekutimi i kërkesave bëhet nga ana e zyrtarëve përkatës të Zyrës së Presidentit.

## II. Themelimi i Këshillit Konsultativ për Komunitete

Këshilli është themeluar nën ombrellën e Presidentit të Republikës së Kosovës, në përputhje me nenin 60 të Kushtetutës së Republikës së Kosovës, nenin 12 të Ligjit për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës dhe në bazë të Statutit për themelimin e Këshillit të miratuar me anë të Dekretit të Presidentit të Republikës së Kosovës Nr. KKK-01-2008, i shfuqizuar me Dekretin Nr. KKK-001-2012, me qëllim avancimi të qasjes dhe pjesëmarrjes së komuniteteve dhe të pjesëtarëve të tyre në jetën publike, ekonomike dhe sociale në Kosovë.

### Vizioni

Një mekanizëm funksional, efektiv dhe i qëndrueshëm në gjendje për të përfaqësuar dhe për të adresuar nevojat, pikëpamjet dhe interesat e të gjitha komuniteteve jo shumicë në Republikën e Kosovës.

### Misioni

Misioni i Këshillit është që, si një mekanizëm për konsultim, bashkërendim dhe shkëmbim të rregullt ndërmjet komuniteteve dhe institucioneve shtetërore, t'ju ndihmojë komuniteteve jo shumicë dhe pjesëtarëve të tyre në realizimin e të drejtave kushtetuese dhe ligjore, si dhe sigurimin e qasjes dhe pjesëmarrjen në jetën politike, ekonomike, sociale dhe kulturore në Kosovë.

## III. Udhëheqja, përbërja dhe struktura organizative e Këshillit Konsultativ për Komunitete


### 1. Udhëheqja e Këshillit Konsultativ për Komunitete

Këshilli udhëhiqet nga Presidentja e Republikës së Kosovës dhe Kryesia e tij në përputhje me nenin 12, pika 4 dhe pika 5 të Ligjit për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës, si dhe nenin 12, 13 dhe 14 të Statutit të Këshillit. Kryesia e Këshillit përbëhet nga kryesuesi dhe dy (2) zëvendësit e kryesuesit, të cilët zgjidhen me anë të shumicës së thjeshtë nga radhët e anëtarëve të emëruar nga Presidenti i Republikës së Kosovës. Asnjëri nga mbajtësit e këtyre posteve nuk përfaqëson të njëjtin komunitet. Kryesuesi dhe zëvendësit e kryesuesit kanë mandat prej një (1) viti, me mundësi të vazhdimit edhe për një (1) vit tjetër.

## 2. Përbërja e Këshillit Konsultativ për Komunitete

Këshilli Konsultativ për Komunitete përbëhet nga përfaqësues të të gjitha komuniteteve të Kosovës dhe përfaqësues të Qeverisë, Zyrës së Presidentes dhe agjencive të tjera relevante, siç është përcaktuar me nenin 12 (6) të Ligjit Nr. 04/L-020 për ndryshimin dhe plotësimin e Ligjit Nr. 03/L-047 Për Mbrojtjen dhe Promovimin e të Drejtave të Komuniteteve dhe Pjesëtarëve të Tyre në Republikën e Kosovës, që përfshin:

- nga dy (2) përfaqësues të komunitetit rom, egjiptian, goran, ashkali, malazez dhe kroat, prej të cilëve nga një (1) mund të jetë deputet i Kuvendit;
- nga tre (3) përfaqësues të komunitetit boshnjak dhe turk, prej të cilëve nga një (1) mund të jetë deputet i Kuvendit;
- pesë (5) përfaqësues të komunitetit serb, prej të cilëve dy (2) mund të jenë deputetë të Kuvendit;
- një (1) përfaqësues i lartë i Zyrës së Presidentit;
- tre (3) përfaqësues të lartë të Qeverisë, që caktohen nga ministria apo agjencia, fushëveprimi i të cilave është me rëndësi të veçantë për komunitet.






### 3. Sekretariati i Këshillit Konsultativ për Komunitete

Këshilli Konsultativ për Komunitete mbështetet nga Sekretariati, i vendosur në Zyrën e Presidentes së Republikës së Kosovës.

Sekretariati udhëhiqet nga Sekretari i Këshillit.

Në kuadër të Sekretariatit janë të angazhuar dy (2) zyrtar të lart ligjor për komunitete dhe një (1) zyrtar i lart për komunikim.



*Struktura organizative e Këshillit Konsultativ për Komunitete*



## IV. Statusi dhe Mandati i Këshillit Konsultativ për Komunitete:

### Statusi i Këshillit

Këshilli vepron nën autoritetin e Presidentit, në të cilin përfaqësohen të gjitha komunitetet.

### Pavarësia e Këshillit

Këshilli, në pajtim me mandatin e tij, është i pavarur dhe vepron në emër të vet gjatë miratimit të vendimeve, rekomandimeve apo kur ndërmerr ndonjë veprim.

Vendimet, rekomandimet dhe veprimet e Këshillit nuk do t'i atribuohen Presidentit.

Kryesuesi, zëvendës kryesuesit dhe anëtarët e Këshillit mbajnë bashkëpërgjegjësinë për vendimet, rekomandimet dhe veprimet që ndërmerr Këshilli, si dhe përgjegjësinë individuale për veprimet e tyre.

### Mandati i Këshillit

1. Mandati i Këshillit, siç është përcaktuar me nenin 60 (3) të Kushtetutës, përfshin:
  - 1.1. Ofrimin e një mekanizmi për shkëmbimin e rregullt ndërmjet komuniteteve dhe Qeverisë;
  - 1.2. Mundësinë e komuniteteve për të komentuar në një fazë të hershme nismat legislative dhe politike, të cilat mund të përgatiten nga Qeveria, për të sugjeruar nisma të tilla dhe për të kërkuar që pikëpamjet e tyre të përfshihen në projektet dhe programet përkatëse;
  - 1.3. Çdo përgjegjësi a funksion tjetër, në pajtim me Ligjin.
2. Këshilli gjithashtu ka mandat të përcaktuar me nenin 12 (1) të Ligjit, që përfshin:
  - 2.1. të ndihmojë në organizimin dhe në artikulimin e pikëpamjeve të komuniteteve dhe pjesëtarëve të tyre në lidhje me legjislacionin, politikat dhe programet publike që kanë rëndësi të veçantë për to;
  - 2.2. Të ofrojë një forum për konsultim dhe bashkërendim ndërmjet komuniteteve dhe të sigurojë funksionimin efikas të organizatave përfaqësuese të komuniteteve, në përputhje me Kodin e Mirësjelljes, që do të miratohet nga Këshilli;
  - 2.3. Të ofrojë një mekanizëm për shkëmbim të rregullt ndërmjet komuniteteve dhe institucioneve shtetërore;
  - 2.4. T'ua ofrojë mundësinë komuniteteve që, në faza të hershme, të marrin pjesë në nismat ligjore apo të politikave, të cilat përgatiten nga Qeveria dhe Kuvendi, të sugjerojë nisma të tilla dhe që mendimi i tyre të inkorporohet në projekte dhe në programe përkatëse, përfshirë Strategjinë

- gjithëpërfshirëse për promovimin dhe mbrojtjen e të drejtave të të gjitha komuniteteve dhe pjesëtarëve të tyre dhe raportin vjetor gjithëpërfshirës që Qeveria ia paraqet Kuvendit për zbatimin e strategjisë së saj, në pajtim me Ligjin;
- 2.5. Të plotësojë kërkesën për konsultime të tjera të detyrueshme në relacion me akte të caktuara ligjore, që janë paraparë në Kushtetutë dhe ligj;
  - 2.6. T'ua mundësojë komuniteteve të marrin pjesë në vlerësimin e nevojave, hartimin, monitorimin dhe vlerësimin e programeve që u kushtohen pjesëtarëve të tyre apo që kanë rëndësi të posaçme për ta;
  - 2.7. Të japë rekomandime gjatë procesit të vendimmarrjes në lidhje me caktimin e fondeve, qofshin ato ndërkombëtare apo të ndara nga buxheti i Republikës së Kosovës, për projekte që u dedikohen komuniteteve apo interesave të tyre të veçanta;
  - 2.8. Të kontribuojë në raportimin e Qeverisë së Republikës së Kosovës para mekanizmave ndërkombëtare për të drejtat e njeriut, dhe
  - 2.9. Të rrisë vetëdijen për brengat e komuniteteve brenda Republikës së Kosovës dhe të kontribuojë në marrëdhëniet e harmonishme ndërmjet të gjitha komuniteteve në Republikën e Kosovës.

### **Kompetencat dhe Përgjegjësitë e Këshillit**

1. Këshilli shkëmben informacione me organet përkatëse të Qeverisë dhe institucionet e tjera dhe jep rekomandime lidhur me komunitetet në Kosovë me qëllim që të nxisë, të mbështesë dhe të promovojë barazi të plotë dhe efektive të pjesëtarëve të komuniteteve në të gjitha fushat e jetës ekonomike, shoqërore, politike dhe kulturore dhe pjesëmarrjen efektive të komuniteteve dhe pjesëtarëve të tyre në jetën publike dhe në vendimmarrje, duke ndërmarrë, por duke mos u kufizuar në masat, si në vijim:
  - 1.1. ndihmon në organizimin dhe në artikulimin e pikëpamjeve të komuniteteve dhe pjesëtarëve të tyre në lidhje me legjislacionin, politikat dhe programet publike që kanë rëndësi të veçantë për to;
  - 1.2. u mundëson komuniteteve që të marrin pjesë në vlerësimin e nevojave, hartimin, monitorimin dhe vlerësimin e programeve dhe strategjive që u kushtohen pjesëtarëve të tyre, apo që kanë rëndësi të posaçme për to;
  - 1.3. rekomandon gjatë procesit të vendimmarrjes në lidhje me caktimin e fondeve, qofshin ato ndërkombëtare, apo të ndara nga Buxheti i Republikës së Kosovës, për projekte që u dedikohen komuniteteve, apo interesave të tyre të veçanta;
  - 1.4. kontribuon në raportimin e Qeverisë që u drejtohet mekanizmave ndërkombëtarë për të drejtat e njeriut, ngre vetëdijen për brengat e komuniteteve brenda Republikës së Kosovës dhe kontribuon në

marrëdhëniet harmonike ndërmjet të gjitha komuniteteve në Republikën e Kosovës, si dhe

1.5. bashkëpunon me Qeverinë në organizimin e ditëve memoriale të komuniteteve.

## V. Sekretariati i Këshillit Konsultativ për Komunitete

1. Këshilli Konsultativ për Komunitete mbështetet nga Sekretariati, i vendosur në Zyrën e Presidentit të Republikës së Kosovës.
2. Sekretariati udhëhiqet nga Sekretari i Këshillit, i cili i përgjigjet dhe raporton drejtpërdrejt Presidentit për fushën që mbulon ky Sekretariat, ndërsa për çështje administrative i përgjigjet sekretarit të Zyrës së Presidentit.
3. Sekretari i Këshillit dhe të punësuarit e tjerë të Sekretariatit përzgjidhen, emërohen dhe shkarkohen në pajtim me dispozitat ligjore për nëpunësit civilë.
4. Detyrat dhe përgjegjësitë e Sekretariatit janë, si në vijim:
  - 4.1. mbështet dhe promovon aktivitetet e Këshillit;
  - 4.2. mbështet Këshillin dhe grupet e tij punuese duke përfshirë organizimin e takimeve, përgatitjen e rendit të ditës dhe mbajtjen e procesverbaleve nga takimet e tyre;
  - 4.3. ndihmon që Këshilli t'i përmbushë detyrimet e tij sipas Ligjit, sipas këtij statuti dhe sipas legjislacionit përkatës në fuqi;
  - 4.4. është përgjegjës për të planifikuar dhe për të menaxhuar me buxhetin e Këshillit;
  - 4.5. ndihmon Këshillin në dhënien e mendimeve në projekt legjislacionin dhe projekt dokumentet e politikave të përgatitura nga Qeveria dhe Kuvendi. Për realizimin e kësaj pike, Sekretariati bashkëpunon edhe me Departamentin për Çështje Juridike dhe Marrëdhënie Ndërkombëtare në kuadër të Zyrës së Presidentit;
  - 4.6. pranon dhe dërgon të gjitha shkresat dhe komunikimet e tjera zyrtare për të gjithë anëtarët e Këshillit;
  - 4.7. bën publikime për aktivitetet e Këshillit, kryen punët e informimit publik, si dhe përgjigjet në kërkesa për informata lidhur me punën e Këshillit;
  - 4.8. përfaqëson Presidencën në zbatimin e procedurave të nominimit, të përfshira në Ligj dhe në Statut.
  - 4.9. angazhohet në zhvillimin e studimeve dhe hulumtimeve për çështjen e komuniteteve dhe, sipas nevojës, kërkon këshilla nga ekspertë të jashtëm;
  - 4.10. mbështet kryerjen e çfarëdo funksioni tjetër të Këshillit në pajtim me Ligjin, me Statutin dhe legjislacionin në fuqi.

## VI. Objektivat e punës për vitin 2022

Në zbatim të funksioneve dhe përgjegjësi të tij, Këshilli ka miratuar Planin Vjetor të Punës për vitin 2022, në të cilin janë përcaktuar objektivat e punës, masat, aktivitetet, afatet për përmbushjen e tyre, institucionet dhe zyrtarët përgjegjës për zbatim.

### Objektivat për vitin 2022

1. Bashkëpunimi dhe koordinimi me institucionet e shtetit në lidhje me legjislacionin, politikat dhe programet publike që kanë rëndësi të veçantë për komunitetet.
2. Thellimi i bashkëpunimit me institucionet në nivelin qendror dhe lokal dhe sektorit joqeveritar me rëndësi për komunitetet.
3. Informimi i përhershëm dhe me kohë i publikut me punën dhe aktivitetet e Këshillit.

## VII. Aktivitetet e Këshillit për periudhën raportuese

Nisur nga mandati, kompetencat dhe përgjegjësit kushtetuese dhe ligjore të përcaktuara, si dhe në zbatim të Planit të Punës, siç u përshkruan në pikën IV, V dhe VI të këtij raporti, Këshilli gjatë vitit 2022, në mënyrë të organizuar dhe sipas dinamikës së paraparë, ka ndihmuar në organizimin dhe në artikullimin e pikëpamjeve të komuniteteve dhe pjesëtarëve të tyre lidhur me legjislacionin, politikat dhe programet publike, që kanë rëndësi të veçantë për ta, duke ua ofruar mundësinë komuniteteve që, në faza të hershme, të marrin pjesë në nismat ligjore apo politikave të cilat përgatiten nga institucionet e shtetit të Kosovës.

Në mënyrë të posaçme, Këshilli ka ngritur, ka trajtuar dhe ka analizuar çështje me interes për pjesëtarët e komuniteteve, siç është fusha e arsimit, punësimit, përdorimit të gjuhëve dhe kulturës.

Bazuar në analizën e kryer të trajtimit dhe shqyrtimit të spektrit të gjerë të të drejtave të komuniteteve dhe pjesëtarëve të tyre, Këshilli ka ngritur dhe ka kërkuar nga institucionet shtetërore të zbatojnë ligjet në fuqi të Republikës së Kosovës dhe praktikatat më të mira të njohjes dhe respektimit të të drejtave të komuniteteve në Republikën e Kosovës.

## Takimet e Këshillit që kryesohen nga Presidentja

Këshilli takohet dy (2) herë në vit, nën kryesimin e Presidentes, për ta bërë një shqyrtim të përgjithshëm të politikave dhe shqetësimeve të komuniteteve në Republikën e Kosovës.

Sekretariati, në bashkëpunim me Kabinetin e Presidentes dhe me Këshillin, bën organizimin e takimeve që kryesohen nga Presidentja.



Takimi i Presidentes me Këshillin është mbajtur më 30 shtator 2022.

Një pjesë e fjalimit të Presidentes znj. Vjosa Osmani Sadriu, në takimin me anëtarët e Këshillit.

Presidentja, shprehi keqardhjen e thellë për ndarjen nga jeta të anëtares së Këshillit Gülten Nobırda, të anëtares dhe përfaqësueses aktive të komunitetit turk, dhe ju shprehi ngushëllimet të gjithë anëtarëve të Këshillit, të cilët i ftoi për një minutë heshtje për të ndjerën.

Më pas presidentja theksoi se, duke pasur parasysh se këto ditë komuniteti boshnjak po feston ditën e vet, i uroj të gjithë pjesëtarët e këtij komuniteti që jetojnë në Republikën e Kosovës, duke i falënderuar për kontributin e vazhdueshëm në procesin e ndërtimit të shtetit të Republikës së Kosovës.

Presidentja i falënderoi të gjithë anëtarët e Këshillit për punën e tyre gjatë këtij viti, duke konsideruar se ky mekanizëm u mundëson të gjithë komuniteteve të marrin pjesë në iniciativat legislative, dhe si rezultat të përmirësojnë dhe të forcojnë të drejtat e komuniteteve që përfaqësojnë.

Siç e dini, puna juaj është përcjellë nga z. Artan Murati, i cili më ka informuar për punën tuaj.

Sa i përket rekomandimeve të Këshillit, që nga fillimi i mandatit kam kërkuar përkushtim nga zyra ime dhe stafi im, që kur janë në pyetje rekomandimet e Këshillit. Gjatë këtij viti, zyra ime ka zhvilluar një sërë takimesh me institucionet përgjegjëse për të trajtuar rekomandimet e dala nga Këshilli. Ndër të tjera kemi pasur një takim me përfaqësues të Ministrisë së Kulturës, Rinisë dhe Sportit, Ministrisë së Vetëqeverisjes Lokale, kryetarin e Komunës së Prizrenit, si dhe me deputetë dhe përfaqësues të shoqërisë civile.

Presidentja, theksoi se propozimi për një rekomandim për shënimin e ditës së diversitetit kulturor është diskutuar, është përcjellë në Kuvend, por shqyrtimi i parë ende nuk është mbajtur. Kur kjo të ndodhë, ne do të jemi në gjendje t'i dërgojmë komentet tona midis dy leximeve.

Lidhur me rekomandimin për Ministrinë e Kulturës, Rinisë dhe Sportit, që ka të bëjë me publikimin e konkursit në gjuhët zyrtare, stafi im u takua me ministrin z. Hajrulla Çeku. Ministri, ka shprehur gatishmërinë e plotë për zbatimin e Ligjit për Përdorimin e Gjuhëve Zyrtare, por theksoi se do të duhet kohë. Gjithashtu na informoi se ministria ka një strategji të re për subvencione në mënyrë që të gjithë qytetarët të trajtohen në mënyrë të barabartë.

Çështja e përdorimit të gjuhëve zyrtare është diskutuar edhe me ministrin z. Elbert Krasniqin, i cili na ka njoftuar se janë duke punuar në një udhëzim të ri administrativ dhe se shpreson të arrihet një konsensus i të gjitha komuniteteve para nënshkrimit të të njëjtit.

Sa i përket rekomandimit për komunën e Prizrenit, stafi im është takuar me nënkryetarin e komunës, z. Kujtim Gashi, dhe kanë kërkuar nga ai që të zbatohen të gjitha rekomandimet e dërguara nga Këshilli.

Në takim, nënkryetari ka njoftuar se për gjuhën boshnjake dhe turke, konkurset janë shpallur, por kanë dështuar për shkak të mos aplikimit të kandidatëve dhe mosplotësimit të kushteve të parapara me konkurs.

Nënkryetari, ka shprehur gatishmërinë e tij për t'u angazhuar në diskutime të mëtejshme për njohjen e gjuhës romë si gjuhë tradicionale në komunën e Prizrenit.

Presidentja, theksoi se edhe pse ende nuk është informuar në detaje për zgjedhjen e anëtarëve të rinj të Këshillit, e di që nuk ka pasur ankesa për procesin zgjedhor, kështu që gjithçka ka shkuar sipas rregullave dhe e ka falënderuar Sekretariatit për suksesin e procesit zgjedhor, si dhe anëtarëve të Këshillit për punën e palodhur gjatë këtij mandati.

Promovimi dhe barazia e të gjitha komuniteteve në Kosovë është prioritet i përbashkët, si Presidente e Republikës, do të angazhohem për të ofruar mbështetje të pakushtëzuar në kuadër të kompetencave kushtetuese dhe ligjore dhe të drejtave të komuniteteve që jetojnë në Kosovë.

Në takim z. Agim Ferati, Kryesues i Këshillit, prezantoi para Presidentes punën e bërë të Këshillit gjatë vitit 2022. Më pas përfaqësuesit e komuniteteve në Këshill, z. Petar Đorđević, nga komuniteti serb, znj. Senada Sagdati, nga komuniteti boshnjak, znj. Sevim Bërveniku, nga komuniteti turk, znj. Adelina Qorraj Emimi nga komuniteti egjiptian, z. Ridvan Gashi nga komuniteti rom, znj. Gyltene Osmani, nga komuniteti ashkali, z. Fehim Sali, nga komuniteti goran, z. Denis Ivić nga komuniteti malazez dhe z. Josip Cirimotić, nga komuniteti kroat, prezantuan para Presidentes, sfidat dhe



problemet me të cilat ballafaqohen komunitetet e tyre në fushën e arsimit, punësimit përdorimit të gjuhëve, të drejtat pronësore si dhe kërkuan mbështetjen e Presidentes në adresimin e tyre te institucionet përkatëse.



Takimin përmbyllës për fund vit i Presidentes me Këshillin është mbajtur më 22 dhjetor 2022.

Presidentja në fjalën e saj i përgëzoi anëtarët e rinj të përzgjedhur të KKK-së dhe ju uroi punë të mbarë për dy vitet e ardhshme.

Presidentja foli për rëndësinë e Këshillit, si organ kushtetues në promovimin e të drejtave të komuniteteve.

Presidentja, theksoi se mandati i KKK-së tregon se ky mekanizëm është një nga zërat më të rëndësishëm të komuniteteve në Kosovë, i cili i jep mundësinë komuniteteve që të përfshihen në nisma legjislative dhe si rezultat, të avancojë pozitën e komuniteteve në vendin tonë.

Presidentja, shprehu gatishmërinë e saj për të vazhduar mbështetjen për punën e KKK-së brenda kompetencave të saj kushtetuese dhe ligjore.

### **Takimet e rregullta të Këshillit**

Këshilli takohet një (1) herë në muaj.

Takimet e Këshillit i thërret dhe i udhëheq kryesuesi i Këshillit, në mungesë të tij, njëri nga zëvendës kryesuesit e tij.

Këshilli gjatë vitit 2022 ka mbajtur takimet e rregullta mujore, gjithsej dymbëdhjetë (12) takime.

Takimet e Këshillit, të grupeve punuese si dhe aktivitetet e tjera të realizuar për gjatë vitit 2022 do të paraqiten në mënyrë kronologjike në vijim:

## Janar

Më 27 janar 2022, Këshilli ka mbajtur takimin e rregullt mujor.

Gjatë këtij muaji janë takuar pesë (5) grupet punuese të Këshillit:

- Grupi Punues për Çështje të Arsimit;
- Grupi Punues për Çështje të Punësimit dhe Çështje Sociale;
- Grupi Punues për Çështje të Kulturës;
- Grupi Punues për Çështje të Gjuhëve;
- Grupi Punues për Legjislacion.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Në takim Këshilli ka shqyrtuar dhe miratuar propozim komentin e Grupit Punues për Legjislacion në Projektligjin për Ndryshimin dhe Plotësimin e Ligjit NR.06/L-056 Për Këshillin Prokurorial të Kosovës.



## Shkurt

Më 24 shkurt 2022, Këshilli ka mbajtur takimin e rregullt mujor.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Gjatë këtij muaji janë takuar katër (4) grupet punuese të Këshillit:

- Grupi Punues për Çështje të Arsimit;
- Grupi Punues për Çështje të Kulturës;
- Grupi Punues Çështje të Gjuhëve;
- Grupi Punues për Legjislacion.



Këshilli në takim ka shqyrtuar dhe miratuar propozim rekomandimin e Grupit Punues për Çështje të Kulturës, për Ministrinë e Kulturës, Rinisë dhe Sportit.

### **Rekomandimi i Këshillit për Ministrinë e Kulturës, Rinisë dhe Sportit**

Të nxjerrë një udhëzim administrativ për financimin e projekteve për komunitetet jo shumicë.

Në çdo konkurs në ministri apo në departamentet e saj, të siguroj që OJQ-të e komuniteteve të jenë pjesë e financimit nga ministria.

Të siguroj financimin e festave për ditët memoriale apo ato nacionale për komunitetet në Kosovë në përputhje me misionin e ministrisë për mbrojtjen dhe promovimin e vlerave kulturore të të gjitha komuniteteve në shoqërinë kosovare.

Në komisionet vlerësuese në ministri për financimin e projekteve apo hartimin e dokumenteve strategjike, së paku një anëtar të jetë nga komunitetet, në mënyrë që të siguroj pjesëmarrje të barabartë dhe transparencë të komuniteteve në Republikën e Kosovës.

[Ministria ka njoftuar për pranimin e rekomandimit të dërguar nga Këshilli, por jo ndonjë përgjigje më të detajuar lidhur me adresimin e çështjeve.](#)

Kryesuesi i Këshillit, z. Agim Ferati, më 03 dhe 09 shkurt 2022, ka marrë pjesë në mbledhjen e Komisionit të posaçëm për shqyrtimin e kandidatëve për emërimin në Gjykatën Kushtetuese për fillimin e procedurës për zgjedhjen e dy (2) gjyqtarëve në Gjykatën Kushtetuese të Republikës së Kosovës.

Anëtari i Këshillit, z. Almedin Fejza, më 09 dhe 16 shkurt 2022, ka marrë pjesë në mbledhjen e Komisionit Vlerësues për Dekorata.

Kryesuesi i Këshillit, z. Agim Ferati, kryesuesi i Grupit Punues për Çështje të Gjuhëve z. Ridvan Gashi, si dhe dy anëtarët e grupit punues, Dragana Mitić dhe Almedin Fejza, më 21 shkurt 2022, me rastin e shënimit të Dirës Ndërkombëtare të Gjuhës Amtare janë pritur në takim nga znj. Linditë Sejdiu Rugova, Dekane në Fakultetin Filologjik në Universitetin e Prishtinës. Në takim znj. Rugova i ka informuar anëtarët e grupit punues për funksionimin e Degës së Ballkanistikës, si dhe është diskutuar për mundësinë e bashkëpunimit të Këshillit me Fakultetin Filologjik në të ardhmen.

### **Mars**

Këshilli gjatë muajit mars nuk e ka mbajtur takim, por janë zhvilluar këto aktivitete gjatë këtij muaji:

Gjatë këtij muaji janë takuar dy (2) grupet punuese të Këshillit:

- Grupi Punues për Çështje të Kulturës;
- Grupi Punues për Çështje të Gjuhëve;

Kryesuesi i Këshillit, z. Agim Ferati, më 10 mars 2022, ka marrë pjesë në mbledhjen e Komisionit të posaçëm për shqyrtimin e kandidatëve për emërim në Gjykatën Kushtetuese.

Grupi Punues për Çështje të Arsimit, ka organizuar tryezën e rrumbullakët me temën Gjendja në arsim për pjesëtarët e komuniteteve jo shumicë në Republikën e Kosovës, më 17 mars 2022 në Prizren. Në tryezën e organizuar kanë marrë pjesë kryesuesi i Këshillit, z. Agim Ferati, kryesuesi i Grupit Punues për Çështje të Arsimit, z. Atakan Koro, zëvendës kryesuesja, znj. Senada Sagdati, anëtarët e grupit punues, z. Fehim Sali dhe z. Senad Gushani.

Drejtoresha në Drejtorinë e Arsimit, znj. Luljeta Veselaj, z. Ferdi Kovaç, zyrtar i lartë i arsimit për komunitetin turk, nga komuna e Prizrenit, z. Samir Shahini, Drejtor në Drejtorinë e Arsimit, nga komuna e Fushë Kosovës, znj. Allltane Tërshnjaku, zyrtare në Drejtorinë e Arsimit nga komuna e Dragashit, znj. Nebahat Bejtullah, përgjegjëse për arsimin e komunitetit turk, nga komuna e Prishtinës, z. Zymber Berisha, nga Drejtoria e Arsimit, komuna e Gjakovës, dhe z. Berat Dindari, zyrtar përgjegjës për arsimin e komunitetit turk, nga komuna e Gjilanit.



Kryesuesi i Këshillit, z. Agim Ferati, i përshëndeti dhe falënderoi të pranishmit për pjesëmarrje në tryezë.

Kryesuesi i Grupit Punues për Çështje të Arsimit, z. Atakan Koro, të pranishmit i njoftoi me punën e grupit punues për gjatë dy viteve, lidhur me çështjet e diskutuara dhe të adresuara në institucionet përkatëse, si dhe me takimin e realizuar me z. Dukagjin Pupovci, Zëvendësministër në Ministrinë e Arsimit, Shkencës, Teknologjisë dhe Inovacionit.

Pjesëmarrësit e tjerë në tryezë në diskutimet e tyre, prezantuan punën, angazhimin si dhe sfidat me të cilat ballafaqohen pjesëtarët e komuniteteve jo shumicë në arsim në



komunat e tyre përkatëse, si dhe theksuan se ato nuk janë të pakta.

Pjesëmarrësit në tryezë e vlerësuan si të dobishme organizimin e tryezës dhe mundësisë që së bashku të diskutojnë për çështjet dhe problemet, me të cilat ndër vite po ballafaqohen pjesëtarët e komuniteteve jo shumicë , në lëminë arsimit, si dhe theksuan nevojën që të gjithë të ofrojnë kontributin në adresimin e të gjitha çështjeve me qëllim të zgjidhjes sa më parë të tyre.

Kryesuesi i Këshillit, z. Agim Ferati, kryesuesi i Grupit Punues për Çështje të Gjuhëve z. Ridvan Gashi, dhe anëtari i grupit punues, Almedin Fejza, më 25 mars 2022, janë pritur në takim, nga z. Shaqir Totaj, kryetar dhe z. Kujtim Gashi, nënkryetar të komunës së Prizrenit. Në takim është diskutuar lidhur me vështirësitë dhe sfidat e zbatimit të Ligjit për Përdorimin e Gjuhëve, në këtë komunë, si dhe është premtuar nga ana e kryetarit që do të ketë angazhim nga ana e tij, për zbatim të plotë të Ligjit për Përdorimin e Gjuhëve në komunën e Prizrenit.

Më 28 - 30 mars 2022, është mbajtur punëtorja për identifikimin e ndryshimeve në Statutin e Këshillit Konsultativ për Komunitete. Anëtarët pjesëmarrës me anë të diskutimeve dhe propozimeve të tyre, kanë identifikuar disa nene të Statutit të Këshillit, për të cilët kanë vlerësuar se është e nevojshme të ndryshohen, njëkohësisht kanë arsyetuar ndryshimin e tyre, si dhe kanë sugjeruar që të kihen parasysh kur të fillohet në hartimin e ndryshimit dhe plotësimit të Statutit.



Anëtari i Këshillit, z. Almedin Fejza, më 31 mars 2022, ka marrë pjesë në mbledhjen e Komisionit Vlerësues për Dekorata.

### Prill

Më 14 prill 2022, Këshilli ka mbajtur takimin e rregullt mujor.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Këshilli në takim ka shqyrtuar dhe miratuar raportin vjetor të punës për vitin 2021.

Në takim Këshilli ka shqyrtuar dhe miratuar propozim rekomandimin për Ministrinë e Zhvillimit Rajonal.



## **Rekomandimi i Këshillit për Ministrinë e Zhvillimit Rajonal**

Ministria e Zhvillimit Rajonal të zgjasë afatin për aplikim të thirrjes për skemën e granteve: "Programi për Zhvillim të Balancuar Rajonal PZHBR 2022" për shkak të mosfunksionalitetit të platformës eKosova në gjuhën serbe dhe bllokadave të mëdha në punën e platformës në Kosovë gjatë ditëve të fundit.

Është pranuar kjo përgjigje nga Ministria e Zhvillimit Rajonal.

Ministria e Zhvillimit Rajonal (MZHR), ka pranuar shkresën e juaj më datë 14.04.2022 lidhur me funksionimin e platformës për aplikim e-kosova për aplikim të granteve në lidhje me thirrjen për propozime "Programi për Zhvillim Rajonal të Balancuar 2022".

MZHR ka pas konsultime me Agjensionin për Shoqëri Informative ASHI në kuadër të Ministrisë së Punëve të Brendshme, e cila na ka njoftuar se platforma ekosova ka qenë në rregull dhe funksionale gjatë gjithë kohës dhe afatit të aplikimit, gjithashtu ju njoftojmë se ne kemi pranuar aplikacione të konsiderueshme në gjuhën serbe nga komunitetet jo shumicë dhe kjo vërteton që sistemi ka qenë në rregull dhe funksional gjatë gjithë kohës.

MZHR për tri vite me radhë është shpallë si ministria më transparencën më të lartë dhe respektimin e dy gjuhësisë dhe njëjtë është kujdesur edhe në këtë rast.

Gjatë këtij muaji është takuar një (1) grup punues i Këshillit:

- Grupi Punues për Legjislacion;

Kryesuesi i Këshillit, z. Agim Ferati, më 08 prill 2022 ka marrë pjesë në takimin e përbashkët me zyrtarët në ministri dhe institucionet përkatëse përgjegjës për trajtimin adekuat të minoriteteve të organizuar nga Këshilli i Evropës me koordinim dhe në përkrahje të Zyrës për Qeverisje të Mirë/ Zyra e Kryeministrit.

Kryesuesi i Këshillit, z. Agim Ferati, më 12 prill 2022 ka marrë pjesë në takimin e parë të Këshillit për Demokraci dhe të Drejtat e Njeriut.

Kryesuesi i Këshillit, z. Agim Ferati dhe Sekretarja e Këshillit, znj. Nafiye Gaš më 28 prill 2022, kanë pritur në takim përfaqësueset nga OSBE, znj. Julija Vitanova dhe Shqipe Hajredini. Në takim është diskutuar për vazhdimin e bashkëpunimit rreth projekteve të përbashkëta ndërinstytucionale që kanë të bëjnë me mbrojtjen dhe promovimin e të drejtave të komuniteteve dhe pjesëtarëve të tyre.



## Maj

Më 05 maj 2022, Këshilli ka mbajtur takimin e rregullt mujor.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Këshilli në takim ka shqyrtuar dhe miratuar propozim komentin në Projektligjin për Arsimin e Lartë në Republikën e Kosovës. Në takim është shqyrtuar dhe miratuar propozimi për shënimin e Ditës së Diversitetit Kulturor për të gjitha komunitetet në Republikën e Kosovës.

### KOMENTET NË PROJEKTLIGJ

#### **Në nenin 6, të Projektligjit,**

**Objektivat e arsimit e të lartë** pas paragrafit 1.7. të shtohet paragrafi si në vijim:

1.8. Ruajtja e Kosovës si një mjedis multietnik dhe multikulturor me mbështetjen e komuniteteve jo shumicë në ruajtjen e kulturës, gjuhës dhe identitetit të tyre.

Arsyetimi:

Arsimi i lartë duhet të mundësojë shkollimin e kuadrit adekuat për komunitetet jo shumicë në gjuhët e komuniteteve, duke siguruar kështu mundësinë e krijimit të mjaftueshëm anëtarëve të komunitetit të arsimuar, të cilët mund të vazhdojnë të punojnë në ruajtjen e gjuhës, kulturës dhe identitetit të komuniteteve të tyre.

#### **Në nenin 14, të Projektligjit**

**Kompetencat e Ministrisë** pas paragrafit 1.17. të shtohet një paragraf të harmonizohet me nenin 21 të Ligjit NR. 03/L-040 për Vetëqeverisjen Lokale, si në vijim:

Neni 21 Kompetenca të zgjeruara në shkollimin universitar

Komuna e Mitrovicës së Veriut ka kompetencë për shkollim të lartë, duke përfshirë regjistrimin dhe licencimin e institucioneve shkollore, punësimin, pagesën e rrogave dhe trajnimin e instruktorëve dhe administratorëve arsimor.

- Është pranuar përgjigje për pranimin e komenteve të dërguara nga Këshilli dhe se të njëjtat do të trajtohen në grupin punues për hartimin e Projektligjit për Arsimin e Latë në Republikën e Kosovës.

Gjatë këtij muaji është takuar një (1) grup punues i Këshillit.

- Grupi Punues për Çështje të Gjuhëve

Përfaqësuesit e komunitetit boshnjak në Këshill, z. Agim Ferati,, znj. Senada Sagdati, z. Almedin Fejza, si dhe tre (3) zyrtarët e Sekretariatit të Këshillit, kanë realizuar vizitë studimore në Sarajevë, më datë 11- 15 maj 2022. Gjatë kësaj vizite janë realizuar takime me: Kryetarin dhe Sekretarin e Përgjithshëm në Këshillin e Kongresit të Boshnjakëve, Drejtorin e Institutit të Bosnjës, Shoqatën Preporod , Shoqatën Merhamet dhe një takim i Përbashkët me Këshillin e Kongresit të Boshnjakëve, Këshillat Nacionale të Boshnjakëve, nga Republika e Kroacisë dhe Republika e Serbisë.



Anëtari i Këshillit, z. Almedin Fejza, më 17 maj 2022, ka marrë pjesë në mbledhjen e Komisionit Vlerësues për Dekorata.

Kryesuesi i Këshillit, z. Agim Ferati, Zëvendëskryesuesja znj. Gúlten Nobirda dhe Sekretarja e Këshillit, znj. Nafiye Gaş, më 26 maj 2022, kanë pritur në takim Ambasadorin Michael Davenport, Shef i Misionit të OSBE-së, në Kosovë, z. Giovanni Corbo, Këshilltar Special për Komunitetet joshqiptare dhe Koordinator i Informimit, znj. Therese Abrahamsen, Zëvendës Shefe e Zyrës për Çështje Politike dhe Komunikim dhe znj. Julija Vitanova, Këshilltare e Lartë për Mbrojtje të Komuniteteve.

Kryesuesi i Këshillit, Agim Ferati, e falënderoi ambasadorin Davenport për mbështetjen të cilën ndër vite OSCE i ka dhënë Këshillit, si dhe kërkoi që kjo mbështetje të vazhdojë dhe të thellohet në të ardhmen. Më pas z. Ferati e informoi ambasadorin, për rolin, punën, funksionimin dhe angazhimin e Këshillit, si dhe sfidat me të cilat ballafaqohen pjesëtarët e komuniteteve jo shumicë në Republikën e Kosovës.



Zëvendëskryesuesja, znj. Gúlten Nobirda, në takim foli për angazhimin e të gjithë anëtarëve në përmbushjen e mandatit të Këshillit, si dhe për rolin, angazhimin dhe integrimin e komunitetit turk në Kosovë.

Ambasadori Davenport, e vlerësoi shumë të rëndësishëm takimin, si dhe shprehi gatishmërinë për vazhdimin e mbështetjes dhe të bashkëpunimit edhe në të ardhmen me Këshillin Konsultativ për Komunitete, në projektet për të cilat vlerësohen se janë me prioritet dhe rëndësi për pjesëtarët e komuniteteve jo shumicë në Kosovë.

## Qershor

Më 02 qershor 2022, Këshilli ka mbajtur takimin e rregullt mujor.



Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Këshilli në takim ka shqyrtuar dhe miratuar propozim rekomandimet për Ministrinë e Kulturës, Rinisë dhe Sportit dhe për komunën e Prizrenit.



### **Rekomandimi për Ministrinë e Kulturës, Rinisë dhe Sportit**

1. Të gjitha konkurset e saja t'i publikojë pa vonesë dhe me kohë në gjuhët zyrtare sipas ligjit për përdorimin e gjuhëve zyrtare.

Ministria ka njoftuar për pranimin e rekomandimit të dërguar nga Këshilli, por jo ndonjë përgjigje më të detajuar lidhur me adresimin e çështjes.

### **Rekomandimi për komunën e Prizrenit**

1. Të siguroj përkthim në gjuhët boshnjake dhe turke.
2. Mbështesim kërkesën e komunitetit rom, që gjuha rome të njihet si gjuhë tradicionale në komunën e Prizrenit.
3. Të punësoj përkthyes në stafin civil për përkthim në gjuhët boshnjake dhe turke.

**Kuvendi Komunal i komunës së Prizrenit ka nxjerrë vendim për njohjen e gjuhës rome si gjuhë në përdorim zyrtar në këtë komunë.**

### **Qershor**

Më 30 qershor 2022, Këshilli ka mbajtur takimin e rregullt mujor.

Gjatë këtij muaji është takuar një (1) grup punues i Këshillit:

- Grupi Punues për Legjislacion.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Këshilli në takim ka shqyrtuar dhe miratuar propozim komentit në Projektligjin për Tekstet Shkollore.

## KOMENTI NË PROJEKTLIGJ

**Në nenin 35, të Projektligjit,**

**Paragrafi 1 i nenit 35, të Projektligjit,** të ndryshohet dhe të plotësohet si në vijim:

Në shkolla mund të jenë në përdorim vetëm tekstet shkollore dhe materialet mësimore të publikuara në katalogun e Ministrisë. **Komunitetet jo shumicë mund t'i përdorin librat dhe materialin mësimor të shteteve amë, edhe nëse ato nuk janë të shtypura në Kosovë, në mënyrë që mësimi të mbahet normalisht.**

- Ministria ka njoftuar për pranimin e komentit të dërguar nga Këshilli, si dhe kanë falënderuar për bashkëpunimin, por jo ndonjë përgjigje më të detajuar lidhur me përfshirjen apo mos përfshirjen e komentit të dërguar nga Këshilli.

Sekretarja e Këshillit, znj. Nafiye Gaš, ka prezantuar në takimin e gjashtë online të nën-komitetit për drejtësi, liri dhe siguri në kuadër të procesit të stabilizim asociimit të organizuar nga BE-ja, të mbajtur më datë 22 dhe 23 qershor 2022, në temën "Koordinimi i përgjithshëm për të drejtat e njeriut duke përfshirë strategjinë gjithëpërfshirëse për të drejtat e njeriut" në kuadër të Drejtave themelore dhe të drejtave të minoriteteve.

Anëtari i Këshillit, z. Almedin Fejza, më 13 dhe 14 qershor 2022, ka marrë pjesë në punëtorinë dy ditore me grupin punues të organizuar nga Ministria e Administrimit të Pushtetit Lokal dhe të mbështetur nga misioni i OSBE-së, për finalizimin e plotësim ndryshimit të Draft Udhëzimit Administrativ për përcaktimin e procedurave për zbatimin e ligjit për përdorimin e gjuhëve.

Anëtarët e Grupit Punues për Çështje të Punësimit dhe Çështje Sociale, znj. Adelina Qorraj Emini dhe z. Josip Cirimotić, kanë pritur në takim, z. Lulzim Qerimi, Nënkryetar për Komunitete në komunën e Lipjanit. Në takim është diskutuar për punësimin e pjesëtarëve të komuniteteve jo shumicë në komunën e Lipjanit, si dhe në përgjithësi për gjendjen e pjesëtarëve të komuniteteve në këtë komunë. Pas diskutimeve të gjithë theksuan nevojën për angazhim të përbashkët për përmirësimin e pozitës së pjesëtarëve të komuniteteve, si në punësim, në arsim dhe në aspektet e tjera në jetën e përditshme.

Më 29-30 qershor në Prevallë, Prizren me mbështetjen e Misionit të OSBE-së në Kosovë, është mbajtur punëtorja për ngritjen e kapaciteteve të anëtarëve të Këshillit Konsultativ për Komunitete.

Temat e trajnimit në punëtori:

Një pasqyrë e mekanizmave për mbrojtjen dhe pjesëmarrjen e komuniteteve lokale;

Shqyrtimi i procesit legjislativ në Kosovë;

Roli i shoqërisë civile dhe komuniteteve (Këshillit) në komentimin e nismave legislative;



Koordinimi dhe bashkëpunimi ndërinstitucional në nivelin qendror, mangësitë, praktikat më të mira dhe rekomandimet:

## Shtator

Më 30 shtator 2022, Këshilli ka mbajtur takimin e rregullt mujor.

Kryesuesi i Këshillit dhe kryesuesit e grupeve punuese kanë raportuar para anëtarëve të Këshillit lidhur me aktivitetet e realizuara ndërmjet dy takimeve të Këshillit.

## Takimi Konstituiv i Këshillit

Më 16 nëntor 2022, është mbajtur takimi konstituiv i Këshillit me përbërjen e re.

Në takim është zgjedhur kryesia e Këshillit prej tre anëtarëve.

Kryesues është zgjedhur z. Agim Ferati, përfaqësues nga komuniteti boshnjak.

Zëvendës kryesuese e parë është zgjedhur, znj. Sevim Bërveniku, përfaqësuese nga komuniteti turk.

Zëvendës kryesues tjetër është zgjedhur, z. Bajram Ilazi, përfaqësues nga komuniteti ashkali.



## Nëntor

Më 30 nëntor 2022, Këshilli ka mbajtur takimin e rregullt mujor.

Kryesuesi i Këshillit ka raportuar para anëtarëve lidhur me aktivitetet e realizuara ndërmjet dy takimeve të Këshillit.

Këshilli në takim ka shqyrtuar propozim vendimin për formimin e grupeve punuese, dhe pas diskutimeve dhe shqyrtimit nga anëtarët, Këshilli ka miratuar vendim për formimin e pesë grupeve punuese.

## Dhjetor

Më 22 dhjetor 2022, Këshilli ka mbajtur takimin e rregullt mujor.

Gjatë këtij muaji janë takuar katër (4) grupe punuese të Këshillit:

- Grupi Punues për Çështje të Arsimit;
- Grupi Punues për Legjislacion;
- Grupi Punues për Çështje të Kulturës;
- Grupi Punues për Çështje të Gjuhëve.

Kryesuesi i Këshillit dhe kryesuesit e grupeve punuese kanë raportuar para anëtarëve lidhur me aktivitetet e realizuara ndërmjet dy takimeve të Këshillit.

Në takim, Këshilli ka shqyrtuar dhe miratuar propozim planin vjetor të punës për vitin 2023.

Këshilli Konsultativ për Komunitete me datë 15 -17 dhjetor 2022, ka organizuar Punëtorinë për hartimin e propozim Planin Vjetor të Punës së Këshillit, për vitin 2023.

Anëtarët pjesëmarrës në punëtori, gjatë punës së tyre të ndarë në grupe punuese, kanë kontribuar me anë të paraqitjes së propozimeve konkrete nga secili grup punues për hartimin e këtij plani.

### Grupet Punuese të Këshillit

1. Këshilli mund të formojë grupe punuese, të cilat përbëhen më së shumti deri në pesë (5) anëtarë, me qëllim të avancimit të punës për çështje konkrete, apo për fusha specifike të Këshillit.
2. Këshilli do t'i zgjedhë anëtarët e grupeve punuese nga specialistë të fushave të veçanta për të punuar në çështjen specifike për të cilën një grup është themeluar.
3. Grupet punuese raportojnë në takime të rregullta të Këshillit për zbatimin e mandatit dhe aktiviteteve të tyre dhe dorëzojnë raporte dhe rekomandime për miratim në Këshill.
4. Grupet punues e pasqyrojnë përbërjen gjinore dhe atë të komuniteteve.
5. Grupet punuese diskutojnë dhe trajtojnë çështje për të cilat vlerësojnë se janë të rëndësishme dhe me interes për komunitetet në takimet e tyre dhe për çështjet e diskutuara dhe të trajtuara informojnë në takimet e rregullta të Këshillit, duke ofruar edhe propozime konkrete për adresimin e çështjeve të diskutuara.
6. Secili grup punues zgjedh kryesuesin e vet dhe një (1) zëvendës kryesues nga mesi i anëtarëve të rregullt të Këshillit që përfaqësojnë komunitetet.

Në kuadër të Këshillit janë të formuara pesë (5) grupe punuese.

Grupi Punues për Çështje të Arsimit

Grupi Punues për Çështje të Punësimit dhe Çështje Sociale

Grupi Punues për Çështje të Gjuhëve

Grupi Punues për Çështje të Kulturës

Grupi Punues për Legjislacion.

**Grupi Punues për Çështje të Arsimit** ka mbajtur katër (4) takime, në të cilat janë diskutuar dhe shqyrtuar çështje lidhur me:

- Diskutim lidhur me aktivitetet e grupit punues për vitin 2022;
- Diskutim lidhur me organizimin e takimeve për çështje të arsimit me zyrtar të nivelit lokal dhe të nivelit qendror;



- Shqyrtimi i Projektligjit për Tekstet Shkollore;
- Zgjedhja e kryesuesit dhe zëvendës kryesuese së grupit punues;
- Organizimin e tryezës së rrumbullakët me temën “Gjendja në arsim për pjesëtarët e komuniteteve jo shumicë në komunat e Republikës së Kosovës”.



**Grupi Punues për Çështje të Gjuhëve** ka mbajtur gjashtë (6) takime, në të cilat janë shqyrtuar dhe diskutuar çështje lidhur me:

- Aktivitetet e grupit punues për vitin 2022;
- Diskutim lidhur me Propozim udhëzimin administrativ për ndryshimin e Udhëzimit 2011/02 Për Përcaktimin e Procedurave për Zbatimin e Ligjit Për Përdorimin e Gjuhëve
- Diskutim lidhur me problemet me Web faqet e komunave në gjuhët e komuniteteve;



- Diskutim lidhur me bashkëpunimin me Zyrën e Komisionerit për Gjuhët;
- Shqyrtimi dhe hartimi i rekomandimi për komunën e Prizrenit;
- Zgjedhja e kryesuesit dhe zëvendës kryesuesit të grupit punues;

**Grupi Punues për Çështje të Punësimit dhe Çështje Sociale** ka mbajtur dy (2) takime, në të cilat janë diskutuar dhe shqyrtuar çështje si në vijim:

- Diskutim lidhur me aktivitetet e grupit punues për vitin 2022;
- Diskutimi lidhur me organizimin e tryezës së rrumbullakët në rajonin e Prishtinës;



**Grupi Punues për Çështje të Kulturës** ka mbajtur tre (3) takime, në të cilat janë diskutuar çështje lidhur me:

- Aktivitetet e grupit punues për vitin 2022;
- Diskutim lidhur me ndarjen e projekteve nga Ministria e Kulturës, Rinisë dhe Sportit;
- Zgjedhja e kryesuesit dhe zëvendës kryesuesit të grupit punues;



**Grupi Punues për Legjislacion** ka mbajtur pesë (5) takime, në të cilat janë diskutuar dhe shqyrtuar çështjet përkatëse lidhur me: Shqyrtimi i Projektligjit për Ndryshimin dhe Plotësimin e Ligjit NR.06/L-056 për Këshillin Prokurorial të Kosovës;

- Shqyrtimin e Programit Legjislativ për Vitin 2022;
- Shqyrtimin e Projektligjit për Arsimin e Lartë në Republikën e Kosovës;
- Diskutim lidhur me inicimin e nismës për shpalljen e Ditës së Diversitetit Kulturor në Kosovë;
- Zgjedhja e kryesuesit dhe zëvendës kryesueses së grupit punues.



### Aktivitetet e Sekretariatit të Këshillit

Sekretariati i Këshillit, në zbatim të përgjegjësiave dhe detyrave, siç janë përshkruar edhe në pikën V të këtij Raporti, ka punuar me përkushtim në përmbushjen e tyre, me kohë ka arritur të sigurojë shërbimet profesionale dhe administrative për Këshillin dhe grupet punuese të tij.

Angazhimi i Sekretares dhe stafit të Sekretariatit ka qenë i fokusuar në organizimin dhe në mbarëvajtjen e nëntë (9) takimeve të rregullta të Këshillit, një (1) takim i Këshillit me Presidenten për shqyrtim të politikave dhe shqetësimeve të komuniteteve në Republikën e Kosovës, një (1) takim përmbyllës i vitit me përbërjen e re të anëtarëve të Këshillit, tetë (8) takimeve të kryesisë së Këshillit dhe nëntëmbëdhjetë (19) takime të grupeve punuese, gjithsej tridhjetë e tetë (38) takime

Në konsultim me kryesinë e Këshillit, kryesuesit e grupeve punuese kanë përgatitur ftesat me rendin e ditës dhe materialin tjetër përcjellës, të cilat në afatin e duhur kohor i janë dërguar anëtarëve të Këshillit, përkatësisht anëtarëve të grupeve punuese.

Kanë përpiluar komunikatat për shtyp, procesverbalet, vendimet dhe rekomandimet nga takimet e lartpërmendura.

Kanë këshilluar anëtarët e Këshillit, në çështjet e ngritura për trajtim si dhe për çështjet e tjera që kanë të bëjnë me punën dhe mandatin e Këshillit Konsultativ për Komunitete.



Ka përgatitur organizimin dhe mbajtjen e një (1) tryeze të rrumbullakët, në të cilën kanë marrë pjesë anëtarët e Grupit Punues për Çështje të Arsimit dhe përfaqësues të drejtorive të arsimit nga komunat.

Ka përgatitur dhe organizuar një takim(1) me organizatat përfaqësuese të komunitetit boshnjak.

Janë përkujdesur që të sigurohet dhe të realizohet në mënyrë të kënaqshme bashkëpunimi përveç me institucionet shtetërore edhe me mediat, organizatat ndërkombëtare, me OJQ-të dhe përfaqësues të tjerë të nivelit komunal, si me Zyrat Komunale për Komunitete dhe Kthim, dhe Komitetet për Komunitete në komuna.

Sekretariati në bashkëpunim me Zyrën e Presidentes të Republikës dhe në pajtueshmëri me Ligjin për Menaxhimin e Financave Publike, ka menaxhuar dhe ekzekutuar me sukses pjesën e buxhetit që i përket Këshillit.

### **VIII. Organizimi i Seancave të Nominimit me Organizatat Përfaqësuese të Komuniteteve**

Bazuar në Statutin e Sekretariatit të Këshillit, Sekretariati ka organizuar seancat e nominimit me Organizatat Përfaqësuese të komuniteteve, si në vijim:

Në Prishtinë, Seanca e Nominimit me organizatat përfaqësuese të komunitetit malazez, më 07 shtator 2022.

Në Prishtinë, Seanca e Nominimit me organizatat përfaqësuese të komunitetit ashkali, më 07 shtator 2022.



Në Prishtinë, Seanca e Nominimit me organizatat përfaqësuese të komunitetit turk, më 09 shtator 2022.

Në Prishtinë, Seanca e Nominimit me organizatat përfaqësuese të komunitetit rom, më 09 shtator 2022.



Në Prishtinë, më 12 shtator 2022, Seanca e Nominimit me organizatat përfaqësuese të komunitetit serb.



Në Dragash, Seanca e Nominimit me organizatat përfaqësuese të komunitetit goran, më 13 shtator 2022.

Në Reçan, Seanca e Nominimit me organizatat përfaqësuese të komunitetit boshnjak, më 13 shtator 2022.



## **IX. Buxheti i Këshillit Konsultativ për Komunitete dhe raporti financiar**

### **1. Buxheti i Këshillit**

Në pajtim me dispozitat përkatëse të ligjit, Këshilli e ka kodin e vet buxhetor në kuadër të buxhetit të Zyrës së Presidentes.

Zyra e Presidentit, me rastin e përcaktimit të shumës së buxhetit vjetor, merr parasysh propozimet e Këshillit.

### **2. Shpenzimet buxhetore sipas kategorive**

Në kategorinë paga dhe mëditje, janë ndarë 38,830.69 €, ndërsa në kategorinë mallra dhe shërbime janë ndarë 82,390.00 €. Vetëm për pagat, përfshirë kontributin pensional dhe tatimin e ndalur në të ardhurat personale, janë paguar në total 38,830.26 €. Buxheti për paga dhe mëditje shprehur në përqindje është shpenzuar 100.00%, ndërsa, në kategorinë mallra dhe shërbime, nga 82,390.00 € sa janë alokuar, janë shpenzuar 72,676.71 €, apo shprehur në përqindje 88.21%. Nga kjo shumë vetëm për paushallin mujor e anëtarëve të Këshillit, përfshirë kontributin pensional dhe tatimin e ndalur në të ardhurat personale janë paguar 50,141.30 €, kurse për shpenzimet për shërbimet (përkthime, zërimi, mirëmbajtja e web faqes) janë shpenzuar 4,838.60 €. Pjesa tjetër e buxhetit 17,696.81 € është shpenzuar për mbulimin e nevojave të tjera ndërlidhura me aktivitetet e Këshillit, grupeve punuese si dhe bashkëpunimeve ndërinstucionale,

ngritjen e kapaciteteve, dhe shpenzimet e tjera lidhur me furnizimet dhe punën në zyrë. Në total janë shpenzuar 111,506.97 € apo shprehur në përqindje 91.98 % e buxhetit të aprovuar për vitin fiskal 2022.

Kategoria e Buxhetit	Buxheti i alokuar	Buxheti i shpenzuar	Shpenzimet në %
Paga dhe mëditje	38,830.69 €	38,830.26 €	100.00%
Mallra dhe shërbime	82,390.00 €	72,676.71 €	88.21%
<b>Total</b>	<b>121,220.69 €</b>	<b>111,506.97 €</b>	<b>91.98%</b>

*Shpenzimet sipas kategorive buxhetore*

Kategoria e Buxhetit	Paushalli mujor, tatime në të ardhurat dhe kontribute	Shpenzimet për shërbimet	Shpenzime tjera
Mallra dhe shërbime	50,141.30 €	4,838.60 €	17,696.81 €

*Shpenzimet nga kategoria mallra dhe shërbime*

### 3. Ekzekutimi i buxhetit

Kërkesat për ekzekutimin e pagave, mëditjeve dhe sigurimin e shërbimeve për plotësimin e nevojave të anëtarëve të Këshillit dhe të Sekretariatit, parashtrohen nga ana e Sekretares së Këshillit, ndërsa ekzekutimi i kërkesave bëhet përmes zhvillimit të procedurave nga ana e zyrtarëve përkatës profesional të Zyrës së Presidentit.

Bashkëpunimi me zyrtarët përkatës të Zyrës së Presidentes dhe ekzekutimi i buxhetit nga ana e tyre, sipas kërkesave të Sekretariatit, është zhvilluar në përputhje me procedurat në fuqi dhe në afatet e caktuara.

#### Sfidat e Këshillit për gjatë vitit 2022:

Sfidat:

Mos marrja e përgjigjeve nga institucionet, në disa nga rekomandimet e dërguara nga Këshilli.

Mungesa e kuorumit për mbajtjen e takimeve të Këshillit dhe të grupeve punuese.

## X. Përfundime

Bazuar në mandatin kushtetues dhe ligjor, në përputhje me kapacitetet dhe me mundësitë buxhetore, Këshilli në masën më të madhe ka arritur objektivat e përcaktuara në planin vjetor të punës për vitin 2022.

Të gjithë anëtarët e Këshillit kanë vijuar me punë në përmbushjen e mandatit kushtetues dhe ligjor.

Të vetëdijshëm për rolin dhe përgjegjësinë e tyre, anëtarët e Këshillit mbeten të përkushtuar që, edhe për gjatë vitit 2023, të vazhdojnë të jenë të angazhuar në thellimin e bashkëpunimit me të gjitha institucionet relevante të vendit, si dhe të zgjerojnë bashkëpunimin me përfaqësuesit e institucioneve ndërkombëtare për të siguruar promovimin, mbrojtjen dhe sigurimin e barazisë së plotë dhe efektive për të gjitha komunitetet dhe pjesëtarët e tyre në Republikën e Kosovës.